

**COVID-19: MAB batalkan tiga penerbangan yang disewa khas bawa balik penumpang kapal persiaran
AstroAwani
16 Februari 2020
Hasimi Muhamad,**

PUTRAJAYA: Malaysia Airlines Bhd (MAB) membatalkan tiga pesawat khas yang disewa oleh Syarikat Kapal Persiaran Hollan American Line susulan penumpang kapal persiaran mewah MS Westerdam disahkan positif koronavirus (COVID-19).

Timbalan Perdana Menteri, Datuk Seri Dr Wan Azizah Wan Ismail berkata, empat pesawat terbabit telah disewa bagi membawa pulang sebahagian penumpang kapal persiaran tersebut dari Lapangan Terbang Antarabangsa Sihanoukville, Kemboja ke pelbagai destinasi terakhir penumpang melalui Lapangan Terbang Antarabangsa Kuala Lumpur (KLIA).

Jelasnya, untuk tujuan tersebut, pihak MAB sebelum ini menyediakan pesawat berkenaan bermula 14 Februari sehingga 16 Februari (hari ini).

“Setakat ini, hanya satu penerbangan sewa khas MH8763 yang membawa 145 orang penumpang telah mendarat di KLIA pada 14 Februari sekitar pukul 7 petang.
“Pihak KKM telah memaklumkan kepada MAS berkenaan kes positif daripada ujian yang dijalankan.

“Sehubungan dengan itu, penumpang-penumpang lain pesawat tersebut dianggap kontak rapat. Berdasarkan kepada keputusan tersebut, MAS telah membatalkan baki penerbangan sewa khas lain,” katanya pada sidang media mengenai perkembangan COVID-19, di sini, pada Ahad.

Dr Wan Azizah sebelum itu mempengerusikan Mesyuarat Khas Jawatankuasa Tertinggi berhubung Penyakit COVID-19, di sini.

Turut hadir Menteri Kesihatan, Datuk Seri Dr Dzulkefly Ahmad; Ketua Pengarah Kesihatan, Datuk Dr Noor Hisham Abdullah dan Ketua Pengarah Agensi Pengurusan Bencana Negara (NADMA), Datuk Mohtar Mohd Abdul Rahman.

Sebelum itu, Wan Azizah memaklumkan kesemua 145 penumpang yang tiba di KLIA telah menjalani ujian saringan sebelum pihak berkuasa berjaya mengesan seorang penumpang wanita warga Amerika Syarikat bergejala dan dibawa ke Hospital Sungai Buloh untuk pemeriksaan lanjut.

Kapal persiaran MS Westerdam, yang didaftarkan di Belanda, tidak dibenarkan berlabuh di Jepun, Taiwan, Guam, Filipinda dan Thailand, sebelum berlabuh di Kemboja pada 13 Februari lalu.

Kapal milik Holland America Line di Seattle, Kanada itu berlepas dari Hong Kong pada 1 Februari lalu.

Ia sepatutnya mengakhiri pelayaran selama 14 hari di Shanghai, tetapi menukar destinasi ke Yokohama, Jepun susulan penularan wabak COVID-19.

**© 2020 Astro Awani Network Sdn. Bhd.
(535275-D) All Rights Reserved.**

Source: <http://www.astroawani.com/berita-malaysia/covid-19-mab-batalkan-tiga-penerbangan-yang-disewa-khas-bawa-balik-penumpang-kapal-persiaran-230861>